

欽定平定教匪紀略

欽定平定教匪紀畧卷十八

十一月十一日

甲戌

那彥成高杞楊遇春奏言查

附近滑城之東北一帶除桃源外留固集八里

營王家道等處均有屯聚賊匪屢圖接應內賊

牽制官兵是以西北一門續經撥兵堵住而正

北一門城內城外之賊匪兩下衝突城上矢石

如雨兵丁屢有傷亡急切未能堵合臣等會同

籌議必須先將外賊殲除杜絕接應方可堵住
西北一門剋期攻取當經撥派將弁帶同知縣
孟岷瞻所領義勇分投探剿先後殲斃留固集
八里營賊匪共計八九百人生擒賊目史泳固
等六名夥賊二百餘人又拏獲女賊目宋張氏
一口均於審明後卽行正法其附近濬縣之石
佛鋪一帶復經長慶富僧德徐錕等督率兵勇

剿殺賊匪一百餘名生擒賊目何泳新等四名
亦卽訊供正法投出被脅民人趙玉興等七名
訊明安插又據留固集八里營等處投出民人
王起志等三百二十五名均經欽遵

諭旨免其誅戮連日各莊民人多有縛賊解送者又
有城中居民縋城投出者訊據供稱賊匪心疑
百姓應官管束甚緊今乘便縋下投生等情臣

等察看情形賊匪外援已絕內潰必生現在竭力布置務將正北一門續行堵住并分派鎮將四面合圍一面開挖濠溝遍排鹿角以杜賊匪竄逸之路查省城前解之礮位八尊尙不甚巨茲方受疇續解到大礮二尊臣等親驗實足以摧堅致遠現於城垣就近處所建築礮臺擬先將城垣轟倒數處官兵卽可從此突入所有著

名賊目或擒或殲斷不使一名漏網卽有餘匪
突圍而遁亦必跟蹤緊剿十餘日內務期掃盡
邪氛滑城一得大功卽可告竣此外各處零匪
無多不難悉數搜捕現在欽奉

諭旨飭令合圍嚴密一鼓蕩平卽畧遲數日亦不降
旨飭催臣等仰蒙

恩施逾格倍深感奮萬不敢因稍寬期限致有遲延

再托津奉

旨赴開州東明一帶堵剿賊匪現在滑城之賊恐剿散後向北投竄開州等處官兵不敷分撥應請

旨將吉林黑龍江官兵各分撥五百名留交托津以備堵剿其餘一千名令其迅赴滑縣軍營協剿

又_臣等前奉

恩旨查明各路領兵大員秉公保奏_臣等查格布舍

富僧德慶祥帶領馬隊特依順保馬元及副將
張大振帶領步隊均在前敵認真出力又三品
頂戴總兵楊芳一員亦帶兵出力理合據實覆
奏恭候

施恩鼓勵

那彥成等又奏言臣那彥成現接百齡來信據
稱曹縣大寨集須兵防守所有沈洪原帶來之

兵丁一千名現已飭令儘數帶回山東以資防堵頃據封邱縣稟報本月初六日有長垣賊匪二千餘人竄入封邱之留光集一帶臣當卽派令富僧德特依順保及遊擊馬光宇帶兵馳赴剿捕并令沈洪順途協剿又附近濬縣白茅莊一帶
一帶有賊匪屯聚據徐銀稟報會同富僧德兩面夾擊殺斃一百數十名生擒賊目張法宗及

賊夥四十七名另行解審餘匪退回莊內官兵
縱火焚燒殲斃無算臣等復飭徐錕嚴加搜捕
此外附近地方如有零星及成股賊匪均隨時
派撥兵勇逐處掃除再臣等欽奉

諭旨令查逆賊馮克善下落現據獲賊姚廷玉供出
馮克善於八月內潛赴德州一帶糾夥應賊姚
廷玉傷重業經正法臣那彥成已密札同興在

德州一帶嚴密查拏其黃興相一犯屍首查官
兵攻克道口之後臣等曾經親赴該處查驗屍
骸枕藉均皆糜爛所有該犯屍身委難辨認仍
當於獲賊再加根究並確查黃興宰下落至前
此獲賊劉成供出之總卦頭李姓及余七昨奉
諭旨英和在盧溝橋一帶查無影響臣等查劉成一
犯前已正法另俟續有獲犯再行根究再前蒙

諭旨飭知賊首李文成在滑縣被刑後於城北李家

莊養傷等因臣派差密探並於生擒賊匪內逐

一研訊僉供卦主李姓有稱李文成者又稱李

四木匠者並稱該犯家口止有一妻一子一女

其逆首聞係劉姓李文成過繼子並稱十五歲

十八歲十一歲不等亦均未見面等供又訪聞

李文成於十月二十左右曾在四間房藏匿迨

官兵攻克道口時帶同家口并賊夥數十人卽由四間房赴開州一帶竄逸等語伏思該犯詭譎異常或竄往他處或仍匿城中均難懸定

臣

惟當通飭領兵大員細心偵捕以期必獲

那彥成又奏言查官兵剿賊以來有豫省候補

知縣孟岷瞻團練義民在滑縣之牛市屯一帶

助官堵剿節次殲擒賊匪二千餘人經臣會同

方受疇奏署滑縣知縣在案查官兵攻克道口之日該義民等續經隨軍打仗燒燬滑縣南關迨官兵剿殺桃源賊匪堵截滑城孟岷瞻又分撥義民將接應內賊之桃源及留固集八里營等處賊匪分投剿捕連日斃賊八九百人生擒二百餘人奪獲旗幟鎗矛甚多實爲奮勉該義民共有三千餘人雖經犒賞銀牌米麵猪羊等

項不足以示獎勵查行營並無賞號惟頂戴可
以榮身臣不敢私自擅給惟有仰懇

逾格恩施加之獎勵其原有頂戴之義民將來有可
補用官職者仍當核實秉公保舉斷不敢稍有

冒濫再臣欽奉

諭旨有被賊裹脅勉強隨行者如先期解散逃避或
手無器械自投者皆免其一死不得妄加誅戮等

因所有留固集八里營等處投出滑濬二縣民人王起志于學能等三百二十五名臣卽飭委員隔別研訊據供均係滑濬縣屬鄉民自賊匪滋事卽被賊目謝玉泰先後擄去分給旗幟器械派撥在前打仗名爲馬前到有不從者立卽殺害無奈隨行屢想投奔大營因賊人管束嚴緊不能得便昨因官兵打破道口賊匪害怕初

三日賊夥四五百人散去剩下謝玉泰同賊四十餘人在八里營王家道保護家口初四日謝玉泰不知何往我等乘便將賊人家口十三四人放火燒斃各帶家口及餘存糧食衣服等項裝載車輛逃出并將賊給旗幟刀矛一百三十餘件呈繳等情反覆究詰僉供如一查驗三百二十五人中內有八九十人均係老弱該民人

隨帶家口一同投出其非詐降可知臣親提查
訊屬實自應欽遵

恩諭免其一死先令委員執持良民黃旗押帶該民
人等遶城數匝大聲傳播令城上賊匪心存解
散一面發交地方官查明造冊釋令各回本處
俾安生業其中另有精壯二十餘名情愿隨營
出力者臣已分撥各將弁嚴行管帶許以殺賊

自効

同日章煦奏言竊臣接據東明縣朱煒廣平營

遊擊福格稟報初二日探得開州慶祖集火起

居民逃避稱有西來賊匪圍村初四日東明境

內公西集等處被賊匪六七百人圍搶卽係慶

祖集竄來該縣會同營汛兵役前往堵禦行至

西角集遇賊正在搶掠上前擒捕殲斃三四十

人並生擒楊廷岡等十餘人訊係曹縣滑縣賊
匪在桃源占踞多日因被官兵剿殺隨同魏唐
二當家共千餘人前來燒搶初五日縣城西北
盧家集馬家寨火起并西角集一帶村莊紛紛
來縣告急又聞有賊匪欲回舊穴余家崗等處
盤踞之信該縣兵力甚單已稟請那彥成調兵
剿辦等語均奏入

上諭軍機大臣傳諭那彥成高杞楊遇春曰那彥成等連日圍堵滑城五門已堵其四其在外應援之賊又經撥派將弁同地方義勇分頭探剿將留固集等處賊匪先後殲斃一千餘人生擒賊目史泳固何泳新女賊目宋張氏及其餘夥匪二百餘人難民紛紛投出現在官軍復開挖濠溝遍排鹿角於近城增築礮臺以備轟擊辦理俱各嚴密賊匪

外援已絕料日內滑城定可攻克惟那彥成等摺
內稱滑城一得大功即可告竣則尙未將大局通
盤籌畫此次逆賊與三省邪匪不同三省邪匪不
過在外省滋擾此次逆賊蓄謀多年敢於先入禁
城計圖內外互應其同教黨與散布各省者不少
甚爲叵測若不趁此兵威剷除萌芽慮滋後患現
在各處謠言雖難盡信然不可不慎密防範卽使

滑城收復看來伏而未動之賊尙實繁有徒一時不能輕議徹兵設使大兵旣徹之後逆黨再有滋擾彼時徵兵調將不特糜費孔多且恐遲誤事機那彥成等旣克滑城後當先將火器健銳二營官兵交原帶將領凱徹其餘各省官兵暫緩徹歸吉林黑龍江官兵更須後徹如有成股賊夥應行剿捕者那彥成卽與高杞楊遇春公同商酌各分一

路前往剿辦卽將所統鎮將巴圖魯侍衛及滿漢
馬步官兵三路均分各自統率伊三人皆可獨當
一面總俟查明各處實無蠢動情形再議班師設
克城之後竟圖草率完結將來遺燼復燃不但不
錄伊等之功俱尙不能逃罪也誼切同仇豈可草
率勉之又據另摺奏被脅民人棄械出投一節此
次投出滑濬難民三百餘人旣將刀矛等一百三

十餘件呈繳其爲良民自屬可信但賊匪詭譎伎
倆安知不於難民中混入數人甚至有賊目亦在
其內不可不防著那彥成等於賊營投出民人務
派委員逐一詳細研詰不可憚勞致有踈縱其所
稱隨營出力之難民二十餘名撥令將弁管帶殊
可不必此等民人與本地義勇不同卽不疑其爲
匪亦何必置之肘腋仍飭令各自散歸爲安又另

摺奏滑縣義民勦賊奮勇請頒給頂戴一節義勇
幫同官兵殺賊數千名自應加之獎勵者准其頒
賞礮礮頂三十個金頂三十個那彥成等擇其尤
爲出力者賞給礮礮頂出力稍次者賞給金頂此
項頂戴無庸自京頒往卽由軍營就近發給分別
記檔事竣造冊咨部勿得逾額冒濫其所稱飭令
沈洪帶兵回至山東防堵一節甚合機宜封邱逼

近黃河已有旨諭知方受疇加意防堵矣

上又命軍機大臣傳諭托津曰章煦奏接據東明縣稟報開州慶祖集地方被賊放火有西來賊匪圍村東明境內公西集等處被賊匪六七百人圍搶訊據獲賊供稱係桃源占踞匪徒被官兵剿散隨同魏唐二當家共千餘人前來燒搶又有賊匪欲回舊穴余家崗等處之信等語滑縣桃源賊匪經

官兵剿殺復竄往開州東明一帶肆行焚掠不可
不迅速剿捕著托津卽督率馬瑜蘇爾慎等上緊
剿殺無任往來竄擾現在滑城賊匪正當攻圍喫
緊之際恐有亡命奔竄零匪並著探明何處有賊
卽向何處迎頭截擊杜其竄逸以盡根株再本日
據那彥成奏訪聞逆首李文成於十月二十左右
曾在四間房藏匿迨官兵攻克道口時帶同賊夥

數十人並家口卽由四間房赴開州一帶等語著
托津卽就近留心躡緝毋任乘間免脫又據那彥
成奏訊據獲賊姚廷玉供稱逆首馮克善於八月
內潛赴德州一帶糾夥應賊等語該逆首馮克善
詭譎多端先期前往德州勾結夥黨意圖接應姚
廷玉既有此供或馮克善此時仍在德州一帶潛
匿昨據章煦奏景州西北鄉連次失火兼有乘火

搶却之事並據盤獲故城縣居住之滑縣人霍應方在彼習教傳徒提省訊辦景州故城皆與德州逼近現有此等情形則馮克善前往糾約之語似屬可信除飭知同興嚴密查拏外托津於滑城攻克直境零匪剿淨後如探聞德州一帶有蠢動之信托津卽就近帶兵迅速前往勦辦毋任滋蔓此時托津先派人密行偵探應於何時馳往一面奏

聞卽一面起程馳往現在京城諸事寧靜布置周
妥托津無庸分心懸念也

上又命軍機大臣傳諭同興曰前據逆首林清及其
甥董綱太供出山東德州有宋躍澂爲首傳教當
經降旨令同興派員偵緝據該撫覆奏僅派員往
查至今並無確實下落昨據章煦奏景州西北鄉
連次失火兼有乘勢搶掠之事景州與德州接壤

恐有匪徒在彼潛匿本日又據那彥成等奏訊取
賊供有賊首馮克善於八月內潛赴德州一帶糾
夥應賊之語可見東境匪徒搜查未淨或宋躍澄
一犯現在德州潛伏未動馮克善到彼糾約亦卽
在附近藏匿該二犯係屬緊要賊目亟應嚴拏懲
辦著同興卽遴派明幹員弁前赴該處設法偵緝
務期弋獲如該逆等竟有拒捕蠢動情事該撫先

金史卷之五十四 遼東 一
就近督兵前往剿辦一面知照托津帶領官兵前往會勦務絕根株

上又命軍機大臣傳諭方受疇曰據那彥成等奏本月初六日有長垣賊匪二千餘人竄入封邱之留光集一帶那彥成等派令富僧德特依順保及遊擊馬光宇帶兵馳赴勦捕并令沈洪帶兵回東順途協剿等語封邱逼近黃河北岸現有賊匪竄往

刻下滑城正在攻圍喫緊之際恐再有零匪南竄
雖有沈洪等在彼堵剿河岸遼濶方受疇當通飭
文武員弁一體加意備禦其南岸一帶亦應嚴密
防範呢瑪善現駐兵蘭陽正與封邱對岸當彼此
互爲聲援毋稍疎懈

上諭內閣曰前次官兵攻克道口賊巢各路帶兵大
員奮勇出力當經降旨令那彥成秉公保奏茲據

查明覆奏格布舍富僧德慶祥特依順保馬元及副將張大振均著加恩交部議叙其三品頂戴總兵楊芳著加恩賞還二品頂戴以示獎勵

同日綿課綿恩桂芳常福奏言竊_臣等奉

派點放馬匹查察哈爾原調馬二千匹前已遵

旨截回馬五百匹共實解到馬一千五百匹現在除黑龍江官兵陸續到京換給馬五百九十四匹外

其餘官兵均不願更換計剩馬九百十匹內以
三百匹遵照兵部原奏補還

圓明園火器健銳三營缺額之馬此外六百十匹
實多瘦小不堪乘騎臣等已將此項馬匹交察
哈爾官兵領回所有往返費用及草餉口分應
請責令貢楚克扎布來靈及解馬總管等賠繳

伏候

訓示得

旨此項察哈爾解京預備吉林黑龍江官兵乘騎馬匹除更換撥補外其瘦小者至六百十匹之多實屬辦理不善此六百十匹往返路費草筋口分俱不淮開銷著責令貢楚克扎布來靈及解馬總管等照數分賠貢楚克扎布身任都統其咎較重著再罰賠馬一千匹補入牧廠缺額以示懲儆

同日慶惠奏言

臣欽奉

諭旨預備吉林黑龍江官兵至大凌河更換馬匹查
現在吉林黑龍江二省官兵俱已全數出境前
該官兵行至大凌河臣將騶騾馬匹均勻挑備
除該官兵等仍騎原馬不願更換外共計更換
騶騾馬九百九十一匹其換下疲乏馬匹內有
殘傷五十二匹照例變價餘俱點交牧長等留

厰牧放奏入報

聞

十一月十三日丙子方受疇奏言查北岸沿河一

帶道路綿長考城蘭陽封邱等縣處處緊要現

當官兵攻城喫緊之時不能兼顧沈洪先駐考

城茲又復帶兵前赴滑縣會勦東南形勢空虛

臣當經挑選省城團練鄉勇三百餘名派委投

効原任都司白鳳山捐職縣丞裴奉恩先後帶
赴北岸祥符封邱適中之黃林集駐紮巡防並
令襄城營都司全保帶兵二百名在祥河十六
堡守禦茲於十一月初七日接據封邱縣知縣
全福等稟報初六日有長垣一股賊匪約二千
餘人竄入該縣胡村留光集一帶滋擾現向西
竄等情臣一面差員確探一面知會呢瑪善派

員帶兵一百名會同原防考城之都司汪鳳臨
並該管文員相機堵剿至山西大同鎮張績帶
兵一千名駐紮豫省河內縣山旺莊地方專防
山口臣已飛咨該鎮並知會那彥成撥兵夾擊
初八日又據探報初七日賊匪在留固莊搶奪
糧食騾馬初八日由陳固集直撲西南所過設
有官兵團勇之處不敢攔入沿途亦未焚殺車

內載有婦女等情查陳固之西連接延津縣陽
武縣一帶相距滑縣已遠察其形迹似欲入山
張績接臣知會後如已帶兵東向正可迎頭剿
截復經加緊咨催並又飛咨那彥成辦理至豫
省及各處官兵俱在滑縣此外兵備空虛設再
有零星之賊分路奔竄勢難遏禦現在北岸之
考城封邱陽武一帶急需設備臣復咨商百齡

酌派將弁添駐北岸考城要地以爲豫東兩省

策應並可屏障江南以顧全局再豫省現在盤

獲賊匪車得新張道綸張進忠三犯臣親提嚴

訊車得新張道綸二犯均係滑縣教匪車得新

係於九月初七日馮克善等戕官刦獄之後始

入賊營張道綸經滑縣查拏監禁後馮克善等

刦獄放出俱隨賊打仗殺人並據張道綸供九

月初五日本縣差拏禁押之時共有二十多人
我只認得張金方李大來張金幅張應元張道
章其餘俱不認識該二犯因官兵攻破道口逃
竄被獲至張進忠一犯係前獲僞元帥李志茂
派赴杞縣糾夥之犯因不敢前往杞縣由僻路
來省探聽信息被獲隨將該三犯分別詰訊他
處地方有無潛往勾結京城內外除林清尙有

夥黨若干等情該犯等堅供並未潛往他處勾
結京城內外並無另有夥黨矢口不移均予正
法至該犯車得新等供有大頭目馮克善因與
李文成不和現赴山東德州那裏另有他徒弟
等語臣已飛咨同興速行緝拏一面仍督率文
武員弁加意巡防並嚴拏未獲各犯謹繕錄車
得新張道綸二犯供單恭呈

御覽

同日同興奏言竊臣欽奉

諭旨查拏餘匪並將定陶等處土賊一併飭拏等因
查曹定邪匪滋事之時本有土匪乘機滋擾自
賊匪剿平後鄉民等紛紛拏獲解官訊明稟報
甚多內假充賊匪焚劫鄉民以及捏充鄉勇搶
掠者無所不有均經分別審辦上月二十四日

據署城武縣知縣曹廷霖稟報該縣事主郭振
綱等多人先後以土賊滋害等情呈報該縣卽
經拏獲多名內有

欽賜國子監助教銜劉竹者竟作狂悖詩句乘機滋
事縱令子姪劉崑翰等嘯聚一村肆行搶掠劉

竹坐享其利經該縣訊明獲賊均係行劫二三

四次不等實屬情同叛匪臣當卽批令將已獲

之劉林奇劉林申劉鳳院張二綱劉三劉巨德

劉文考劉六劉協力楊皆曹伯謙劉翠峰十二

犯正法訖其劉竹一犯身係職員臣現親提覆

訊查初彭齡所奏檢討劉洙自卽係其人應行

從重辦理其子劉崑起劉崑翰姪劉臻三犯現

均在逃飭緝務獲其所稱嶧縣郟城另有土賊

燒搶之案臣已密派標弁前往查拏另行審辦

再曹定一帶連日據出哨弁兵拏獲零星潰匪六十餘人訊稱俱因道口攻破奔竄等語並探明有賊一千五六百人車七八十輛乘馬賊二百餘人從滑縣逃出往西南奔竄適多隆武奉那彥成調赴滑縣帶去兵六百四十名沿途攔截該匪等卽往長垣之小青集一帶奔竄隨後復有一股併入多隆武現紮營長垣境內之何

大連集相機剿殺

臣

已飛咨托津及馬瑜蘇爾

慎閔俊烈并札知陳廣寧嚴密防剿兼恐該匪

南竄復飛咨百齡派兵堵剿再

臣欽奉

諭旨將蘆商捐銀十三萬兩東商捐銀七萬兩俱解

赴保定備用查東省現辦軍務藩運兩庫存欸無

多且須辦理賑卹挑挖泉渠合無仰懇

聖恩將東省捐銀七萬兩改留東省備用奏入

上命軍機大臣傳諭托津日前據章煦奏東明開州境內有由滑縣竄來賊匪千餘人在該處村莊焚掠又據那彥成奏賊首李文成攜帶夥黨家屬由四間房前赴開州藏匿並訊據活賊姚廷玉供稱賊首馮克善於八月潛赴德州糾人應賊等語昨已降旨詳悉指示飭令托津迅速查辦日來開州東明一帶竄來賊匪托津曾否督兵剿捕掃除淨

盡首逆李文成曾否得有真實下落著托津遵照
前旨上緊辦理迅速覆奏至馮克善一犯本日又
據方受疇奏訊據獲犯車得新等供稱該犯與李
文成不和現已前赴德州其陰謀詭譎恐係勾結
夥黨冀圖接應德州距京甚近萬分緊要現在附
近德州之景州故城屢有放火搶劫及民人移徙
情事不可不密爲防範除飭令同興嚴密查拏外

仍著托津遴派明幹員弁先赴該處密爲偵探如有蠢動情形托津卽帶領將弁兵丁速赴德州托津此時上緊辦理直境零匪心中總須兼防德州一帶京南一路現無重兵托津當嚴籌屏衛毋令賊蹤北竄此爲至要

上又命軍機大臣傳諭章煦日前日那彥成奏訊據獲犯姚廷玉供稱賊首馮克善於八月間往山東

德州今日又據方受疇奏盤獲賊犯車得新等亦
供馮克善已往德州等語馮克善係緊要賊首其
潛赴德州必係勾結滋事除諭知同興查拏外德
州與直隸景州毗連章煦前奏景州西北鄉連有
夜間放火之事會否飭查明確有無糾約情形並
著迅速具奏飭知天津鎮道等一體留心防範

上又命軍機大臣傳諭同興曰前日據那彥成奏訊

據獲賊姚廷玉供稱馮克善於八月內已往德州
當經降旨同興查緝本日又據方受疇奏盤獲賊
犯車得新等亦據供稱大頭目馮克善因與李文
成不和現已前往山東德州等語馮克善往德州
之說兩處賊供皆同自屬確鑿該逆係與李文成
牛亮臣等商同起事之人爲賊管緊要頭目此次
前赴德州斷非在彼潛匿必係勾結同教之人又

圖滋事德州與直隸接壤距京祇六百餘里該處
本有教首宋躍濇一犯飭拏未獲今馮克善又復
前往看來山東逆夥尙多並聞附近州縣仍時有
焚搶村莊之事難保無匪徒互相糾應不可不加
意防範同興駐劄曹州但知防堵竄匪豈所屬境
內另有劇賊藏伏竟漫不關心著卽迅速遴派文
武幹員星夜馳往德州嚴查馮克善及宋躍濇蹤

跡務得切實下落設法擒獲設有蠢動情事該撫
迅卽帶兵剿捕一面飛咨托津就近移師剿辦勿
任散逸北竄

臣等謹按馮克善一犯詭稱地皇與林清李
文成同爲逆案渠魁當李文成監禁滑縣之
時卽係該逆同牛亮臣徐安燭等劫獄戕官
首先肆惡而其黨羽伏匿于德州景州故城

一帶者尤多是時官兵專注滑縣攻城未下
人但見李文成率其夥黨數千由延津西竄
顯然有入山之勢皆以爲蔓延可憂而不知
馮克善之子身潛竄倏赴山東其就宋躍澧
勾結煽動另圖滋事者距京畿祇在數百里
之間其心尤爲叵測其患尤爲切近稍或易
視後將難圖我

皇上因那彥成方受疇先將奏到賊供參觀互証斷
其蹤跡所在亟

命章煦同興等設法偵緝四路密防自此旬日之間
籌筆般頒

肝宵無間旋據章煦奏報果於直隸獻縣地方躡訪
捕獲逆謀未逞消除隱憂良由

睿慮精詳先幾

指示故能鯨鯢就戮風濤不驚海宇蒙晏安之福也
上又命軍機大臣傳諭同興曰據同興奏拏獲城武
縣土賊辦理一摺此案同興所奏拏獲國子監助
教銜劉竹一犯自卽係初彭齡所奏之劉洙該犯
膽敢乘邪匪滋事之時編造狂悖詩句縱令子姪
多人乘機糾搶坐享其利可惡已極現據拏獲劉
林奇等十二犯審訊明確該撫飭令立時正法辦

理甚是其劉竹一犯著該撫親提嚴訊是否曾入
邪教與曹縣定陶滋事匪徒有無勾串其所作詩
句如何狂悖並著抄錄呈覽如訊明該犯止於糾
搶圖利已當斬決梟示如滋擾地方戕害多人卽
應照叛逆之律問擬不可輕縱其子劉崑起劉崑
翰其姪劉臻現均在逃著卽嚴飭緝拏務獲按律
懲辦其蘭嶧一帶匪徒並嚴飭各地方文武官認

真彈壓實力稽查毋稍大意至竄往長垣小青集
之賊該撫現已知照托津等派兵防剿務嚴密堵
禦毋令四出旁竄又據奏請將東商捐銀七萬兩
改留東省備用一節東省現辦軍需此外尙有賑
卹挑渠等用著准其將此項銀七萬兩就近留於
該省支撥至該省積存捐監銀兩未經解部者著
該撫飭知藩司查明共有若干亦奏明歸入軍需

項下動用

上又命軍機大臣傳諭方受疇曰據方受疇奏封邱縣留光集一帶帶長垣竄匪二千餘人前來滋擾現向西竄並探知賊匪由陳固集直撲西南等語陳固西與延津陽武接壤該處近接懷慶賊匪向彼竄逸似有入山之意甚爲可恨太行山路紛歧一經匪徒竄入辦理棘手昨據那彥成等奏於得

信後卽派令富僧德特依順保馬光宇帶兵馳往
剿捕并令沈洪順途協剿茲又經方受疇派委文
武員弁督率兵勇相機堵剿並知會張績帶兵迎
頭堵截竄匪祇二千餘人如富僧德等追及前有
張績攔截自可就地殲除倘兵力不敷該撫卽飛
速知會那彥成撥兵會剿毋稍遲緩

上又命軍機大臣傳諭陝甘總督長齡曰長齡前在

河南巡撫任內於滑縣匪徒傳教謀逆毫無覺察
本有應得之咎朕念賊匪傳教積有歲月並非始
自長齡任內從寬不加譴責且擢用爲陝甘總督
長齡當倍加感激朕恩力圖報効前據逆首林清
之甥董悃太供有蘭州人劉五訓在彼糾人入教
與滑縣賊首李文成往來勾通當卽降旨諭令董
教增派員密拏其有無弋獲現尙未據奏到長齡

到任時如尙未將該犯緝獲著卽添派幹員於蘭州所屬地方嚴察密訪務將劉五訓一犯設法拏獲親提嚴訊錄供具奏並向該犯嚴究夥黨按名查拏毋稍疎縱

同日銜齡奏言前准那彥成咨調晉省馬二千匹續又欽奉

諭旨飭買馬一千匹騾一千頭解送衛輝總局臣當

卽分別飭辦茲接那彥成來咨以大功指日告竣祇需馬一千匹其餘一千匹行令停止臣查有前此飭調之綏遠城滿營馬一千匹尙未過省卽令回營餘均分別趕辦解豫應用奏入報

聞